



INFORME DE LEGALIDADE SOBRE O “PROXECTO DE DECRETO POLO QUE SE ESTABLECE O CURRÍCULO DO CICLO FORMATIVO DE GRAO SUPERIOR CORRESPONDENTE AO TÍTULO DE TÉCNICO SUPERIOR EN PROMOCIÓN DE IGUALDADE DE XÉNERO.”

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, en relación co “proxecto de decreto polo que se establece o currículo do ciclo formativo de grao superior correspondente ao título de técnico superior en promoción de igualdade de xénero”, emite o seguinte:

INFORME

1. Marco normativo e competencial

O Estatuto de autonomía de Galicia, no seu artigo 31, establece que é competencia plena da Comunidade Autónoma de Galicia a regulación e administración da ensinanza en toda a súa extensión, niveis, graos, modalidades e especialidades, competencia que o Decreto 4/2013, do 10 de xaneiro, atribúe á Consellería de Cultura, Educación e Ordenación Universitaria.

Forman parte da normativa sectorial de aplicación as seguintes normas:

A Lei orgánica 5/2002, do 19 de xuño, das cualificacións e da formación profesional, ten por obxecto a ordenación dun sistema integral de formación profesional, cualificacións e acreditación que responda con eficacia e transparencia ás demandas sociais e económicas a través das modalidades formativas. Esta lei atribúe á Administración xeral do Estado, de conformidade co artigo 149.1, 30^a e 7^a da Constitución española, a competencia para determinar os títulos de formación profesional e os certificados de profesionalidade que constituirán as ofertas de formación profesional referidas ao Catálogo nacional de cualificacións profesionais, cuxos contidos poderán ampliar as administracións educativas no ámbito das súas competencias.

O Real decreto 1147/2011, do 29 de xullo, establece a ordenación xeral da formación profesional do sistema educativo, tomando como base o Catálogo nacional de cualificacións profesionais, as directrices fixadas pola Unión Europea e outros aspectos de interese social. No artigo 8.1



establécese, así mesmo que os títulos de formación profesional e os certificados de profesionalidade terán carácter oficial e validez en todo o territorio do Estado e serán expedidos polas administracións competentes.

O Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia, determina nos seus capítulos III e IV, dedicados ao currículo e á organización das ensinanzas, a estrutura que deben seguir os currículos e os módulos profesionais dos ciclos formativos na Comunidade Autónoma de Galicia.

Publicado o Real decreto 779/2013, do 11 de outubro, polo que se establece o título de técnico superior en Promoción de Igualdade de Xénero e se fixan as súas ensinanzas mínimas, e de acordo co seu artigo 10.2, correspónelle á consellería con competencias en materia de educación establecer o currículo correspondente no ámbito da Comunidade Autónoma de Galicia.

2. Acerto e oportunidade

O Decreto 114/2011, do 1 de xullo, determina que a consellería con competencias en materia de educación establecerá o currículo básico de cada ciclo formativo.

Este proxecto de decreto desenvolve o currículo formativo de formación profesional de técnico en Promoción de Igualdade de Xénero, de acordo co Real decreto 907/2013, do 22 de novembro, para adaptar a nova titulación ao campo profesional e de traballo da realidade socioeconómica galega e ás necesidades de cualificación do sector produtivo respecto da especialización e polivalencia, e posibilita unha inserción laboral inmediata e unha proxección profesional futura.

3. Tramitación

O artigo 133 da Lei 1/2015, do 1 de outubro, de procedemento administrativo común introduciu, establece a necesidade de tramitar unha consulta pública antes de iniciar calquera procedemento de elaboración de normas de carácter legal ou regulamentario. Non obstante, logo de ponderar os intereses públicos implicados considerouse conveniente a inminente iniciación da tramitación sen prexuízo da concesión, ao final da fase inicial da tramitación normativa, do máis amplio período de exposición pública da norma no Portal de Transparencia.



Polo que respecta á instrución na elaboración do proxecto normativo, esta acomodouse ao procedemento legal e ás prescricións contidas nos artigos 40 a 44 da Lei 16/2010, do 17 de decembro, de organización e funcionamento da Administración xeral e o sector público autonómico de Galicia.

Así, o centro directivo impulsor remitiu á Secretaría Xeral de Cultura o borrador da disposición acompañado dos documentos que de seguido se relacionan, (artigo 41.2. apartados a), b), d), da Lei 16/2010, do 17 de decembro):

- Unha memoria xustificativa
- Unha memoria económico-financeira.
- Unha táboa de vixencias con indicación dunha cláusula xenérica de derogación de normas de igual ou inferior rango.

Unha vez recibida a documentación e logo do seu estudio, o Servizo Técnico-Xurídico da Consellería, elaborou o preceptivo informe e obtivo a aprobación inicial do anteproxecto como proxecto pola persoa titular da Consellería de Cultura, Educación e Ordenación Universitaria (artigos 41.2 c) e 41.3 da Lei 16/2010, do 17 de decembro).

Unha vez aprobada inicialmente a disposición como proxecto, este publicouse no Portal de Transparencia e goberno aberto indicando á cidadanía a posibilidade de formular alegacións e suxestións.

Para os efectos do disposto no artigo 42 da LOFAXGA así como na pertinente normativa sectorial de aplicación, achégase ao expediente de tramitación do regulamento, os seguintes informes:

- Informe de sostenibilidade financeira da Dirección Xeral de Planificación e Orzamentos da Consellería de Facenda
- Informe de impacto de xénero da Secretaría Xeral de Igualdade
- Ditame do Consello Escolar de Galicia
- Certificado presentación e información do proxecto no Consello Galego de Formación Profesional
- Informe da Dirección Xeral de Educación, Formación Profesional e Innovación Educativa sobre as alegacións formuladas nos anteriores informes.



Na fase final da tramitación normativa a que se refire o artigo 43 da Lei 16/2010, do 17 de decembro, solicitouse un informe de legalidade e técnica normativa á Asesoría Xurídica da Consellería de Cultura, Educación e Ordenación Universitaria, que o emitiu, en sentido favorable o 5 de marzo de 2018.

4. Legalidade

Tendo en conta que o proxecto de decreto desenvolve normas básicas do Estado, deberá someterse ao ditame preceptivo do Consello Consultivo de Galicia, de acordo co disposto no artigo 12 letra c) da Lei 3/2014, do 24 de abril, do Consello Consultivo de Galicia.

O proxecto someterase á aprobación definitiva da persoa titular da Consellería de Cultura, Educación e Ordenación Universitaria e finalmente remitirase á Comisión de Secretarios Xerais previa á súa aprobación polo Consello da Xunta de Galicia, segundo o artigo 43 da Lei 16/2010, do 17 de decembro.

De acordo co indicado, considérase que este proxecto de decreto reúne as condicións esenciais para a súa aplicación e efectividade polo que se considera que o proxecto de decreto sometido a informe se axusta á legalidade vixente e, en consecuencia, o **informo favorablemente** (artigo 43.2 da Lei 16/2010, do 17 de decembro).

Santiago de Compostela, 2 de abril de 2018

O secretario xeral técnico

Jesús Oitavén Barcala

